

Plenchi

Bèl a bati

Bon bini riba plenchi. TRINGG TRINGGG bèlèm..... TRINGG TRINGGG bèlèm.....Bèlèm bèlèm. Nos klòk a kuminsá zona paso nos ta sinti holo di pasku kaba. Bo tambe a sintie. Esta nèchi Korsou a keda dòná na lus i dekorashon di pasku. Kreando un ambiente di harmonia pa nos por disfrutá di dje. Ban laga e ambiente aki inspirá nos tur pa traha tambe riba nos komportashon. Riba nos konvivensia pa ku otro. Ban saka un man pa brasa otro i no pa hasi otro daño. Ban saka un man pa brasa otro i no pa dal otro. Ban saka un man pa invitá otro i no pa shikui/kore ku otro.

Pasku ta mas ku dekorashon, bisti bunita i kome hopi. Pasku ta pa huntu krea un ambiente di pas i harmonia. Den kas, riba kaya, na trabou, na skol, den tráfiiko. Hasie un reto pa henter famia, pa boso yuda otro ta mas servisial i kariñoso ku otro. Pone e meta bini ku un palabra sekreto ku bo famia ta traha pa kada bes ku boso deskubri ku e otro a lubidá di usa palabranan di empatia i di harmonia. Hasie un propósito pa fin di aña i purba pa e dura henter aña. Usa palabranan di bendishon i afirmativo mas tantu. Djis pa bon pidi bendishon i amor pa diferente hende ku bo topa den bo kaminda. Na trabou, den tráfiiko. Un felis siman pa bo. Disfrutá di nos plechi.

Riba roster

Regina Pacis ta demonstrá nan esfuerso i amor pa kuido. Hobennan di klas ZW43 PKL ta preparando nan mes ku hopi pashon pa trabou ku nan a skohe pa hasi. Kuido, esei ta nan eskoho. Nos por mira kon nan a siña tiltechnieken pa asina nan por hisa pashentnan fásil, pa por duna kuida di kalidat. Bunita pa mira e hóbennan aki motivá pa duna kalidat den kuido.







Not'è riba bòrchi

Kolegio Maria Auxiliadora su grupo 8 A i B a bishitá Carmabi na Piskadera pa siña tokante bida di tribon i nos koralnan. Asina nos alumnonan ta siña balorá i protehá nos naturalesa. Nan a wordu bon informá i nan a pasa masha dushi mes





Den agènda

Fakansi di skol:

21 desèmber te ku 3 yanuari.

Selebrashon

Selebrashon hubilarionan di RK i brindis di aña nobo 11 di yanuari

Mi ta konta

Tres bon amigu.

Tabatin 3 bon amigu, pero kada un ta un. Nan no tabata parse otro na nada, pero nan tabata inseparabel den tempu bon i tempu malu. Theo tabata kolor blanku blanku manera sneu. E tabata delikado i amabel ku tur hende, pero tambe floho i gusta sinta pornada kabishá. Nan tabata yame mener Katuna. Su amiga tabata diferente, fuerte, dínamiko, trabahador. E di tres amigu tabata kolor bruin, kòrtiku, ku bon smak pa bisti i kuminda eksisito. Pero hopi biaha e tabata rabia i kusumí pa e logra loke e gusta. E tabata yama mener Kõfi. Nan 3 tabata semper huntu i tabata yuda otro kompartiendò momentunan kontentu i di fedrit. Pali muhe tabata mustra mener Katuna, kon ta traha duru i laga flohera. Mener Kõfi tabata mustra su amigunan kon

pa nan ta perfekshonista, kon tene kuenta ku detayes pa loke bo hasi ta di kalidat. Mener katuna di su parti semper tabatin bon beis, e ta demostrá pasenshi i ta semper kalmu den tur situashon. Ora mener Kòfi ta rabia sulfur, semper mener Katuna por a trankilisé ku su pasenshi i positivismo.

Pero riba un dia mener Katuna a disidí di bai drumi den solo pa e haña kolor bruin. Pero floho manera e ta el a keda drumí den e solo kayente pa mas ku 6 ora largu. Ora el a lantá e tabata tur zurí di tantu drumi i kima den solo. Su kurpa tabata pika i el a bula den laman pa freska su kurpa. E laman su koriente a kuminsá lastre bai ku ne. Floho manera e tabata e no tabatin fòrsa pa e landa bai kantu. El a kai den pániko. El a kuminá grita ausilio mas duru ku e por. Paso e no por a landa.

Mener Kòfi i Pali Muhe a kana bin foi trabou den un diskushon fuerte. Un gritamentu i pleitamentu mahos. Nan a sinti falta di mener Katuna, ku semper ta kalma nan. Mener Kòfi a keda pará rabiá ta sufurá. Pali muhé a kana bai buska su amigu mener Katuna. Pali muhe a mira su amigu ta bai abou, el a bula den awa i ku fòrsa el a kargue saka afo. Mener Katuna a gradisí su amiga. Splikando ku e kier a bira manera mener Kòfi I manera Pali Muhe. Fuerte I perfecto. E amiga a splike ku tur esaki ta pasa paso e ta asina dormilon. E no por bira manera Kòfi, paso kada un ta un. Nan a yega na e konklushon ku nan ta diferente pero kada un tin nan kalidat. Nan mester di otro pa nan por ta eksitoso. Nan a braza otro fuerte i a keda amigu pa semper.

Un prenci

Mucha djispou

Marlene: Yufrouw ta duna straf ora ami no hasi nada?

Yufrou: Marlene, ta kon bo por pensa algu asina di mi. Si bo no hasi nada bo no por haña straf.

Marlene: Bon yufrouw, paso mi no a traha niun di e sòmnan ayera na kas